

॥ तैत्तिरीय संहिता ॥

॥ चतुर्थः प्रश्नः ॥

॥ तैत्तिरीयसंहितायां चतुर्थकाण्डे चतुर्थः प्रश्नः ॥

र॒श्मिर॑सि॒ क्षया॑य त्वा॒ क्षयं॑ जि॒न्व प्रेति॑रसि॒ धर्मा॑य त्वा॒ धर्मं॑
जि॒न्वान्वि॑तिरसि दि॒वे त्वा॒ दिवं॑ जि॒न्व संधि॑रस्यन्तरि॒क्षाय॑
त्वा॒न्तरि॑क्षं जि॒न्व प्रति॑धिर॒सि पृथि॑व्यै त्वा॒ पृथि॑वीं
जि॒न्व विष्ट॑म्भोऽसि॒ वृष्ट्यै॑ त्वा॒ वृष्टिं॑ जि॒न्व प्र॒वास्य॑हे
त्वाह॑र्जि॒न्वानु॑वासि॒ रात्रि॑यै त्वा॒ रात्रिं॑ जि॒न्वोशि॑गंसि॥१॥

वसु॑भ्यस्त्वा॒ वसू॑ञ्जि॒न्व प्रके॑तोऽसि॒ रुद्रे॑भ्यस्त्वा
रु॒द्राञ्जि॒न्व सु॒दीति॑रस्यादि॒त्येभ्य॑स्त्वाऽऽदि॒त्याञ्जि॒न्वौजो॑-
ऽसि पि॒तृभ्य॑स्त्वा पि॒तृञ्जि॒न्व तन्तु॑रसि॒ प्रजा॑भ्यस्त्वा
प्र॒जा जि॒न्व पृ॒तना॑षाडसि॒ पशु॑भ्यस्त्वा प॒शूञ्जि॒न्व
रे॒वद॑स्योष॑धीभ्य॒स्त्वौष॑धीर्जि॒न्वाभि॑जिदसि॒ युक्त॑ग्रा॒वेन्द्रा॑य॒
त्वेन्द्रं॑ जि॒न्वाधि॑पतिरसि॒ प्राणा॑य॥२॥

त्वा॒ प्रा॒णं जि॒न्व यन्ता॑स्य॒पा॒नाय॑ त्वा॒पा॒नं जि॒न्व स॒५स॒र्पो-
ऽसि चक्षु॑षे त्वा॒ चक्षु॑र्जि॒न्व वयो॑धा अ॒सि श्रोत्रा॑य त्वा॒ श्रोत्रं॑

जिन्व त्रिवृदसि प्रवृदसि संवृदसि विवृदसि स॒रोहो॑ऽसि
नीरोहो॑ऽसि प्ररोहो॑ऽस्यनुरोहो॑ऽसि वसुको॑ऽसि वेष॑श्चिरसि
वस्य॑ष्टिरसि॥ ३॥

उशिर्गसि प्राणाय त्रिच॑त्वारि॒शच्च॥ [१]

राज्य॑सि प्राची दि॒ग्वस॑वस्ते दे॒वा अधि॑पतयो-
ऽग्नि॑र्हेतीनाम्प्रतिध॑र्ता त्रिवृ॑त्त्वा स्तोमः पृथि॑व्याऽ
श्रय॑त्वाज्यमु॒क्थमव्य॑थयथस्त॒भ्रातु रथ॑न्तर॒ साम॒ प्रति॑ष्ठित्यै
वि॒राड॑सि दक्षि॑णा दि॒ग्रास्ते दे॒वा अधि॑पतय इन्द्रो॑
हेती॑नाम्प्रतिध॑र्ता प॒ञ्चद॑शस्त्वा स्तोमः पृथि॑व्याऽ श्रय॑तु
प्र॒उ॒गमु॒क्थमव्य॑थयथस्त॒भ्रातु बृ॒ह॒थ्साम॒ प्रति॑ष्ठित्यै स॒म्राड॑सि
प्रती॑ची दिक्॥ ४॥

आ॒दि॒त्यास्ते दे॒वा अधि॑पतयः सोमो॑ हेती॑नाम्प्रतिध॑र्ता
स॒प्तद॑शस्त्वा स्तोमः पृथि॑व्याऽ श्रय॑तु मरु॒त्वती॑यमु॒क्थ-
मव्य॑थयथस्त॒भ्रातु वैरू॑पऽ साम॒ प्रति॑ष्ठित्यै स्व॒राड॑स्युदी॒ची
दि॒ग्वि॒श्वे ते दे॒वा अधि॑पतयो वरु॑णो हेती॑नाम्प्रतिध॑र्तैक-
वि॒श॑स्त्वा स्तोमः पृथि॑व्याऽ श्रय॑तु निष्कै॑वल्यमु॒क्थमव्य॑थयथस्त॒
वैरा॑जऽ साम॒ प्रति॑ष्ठित्या अधि॑पत्यसि बृ॒हती दि॒ङ्मरु॑तस्ते
दे॒वा अधि॑पतयः॥ ५॥

बृहस्पतिरहेतीनाम्प्रतिधृता त्रिणवत्रयस्त्रिंशौ त्वा
 स्तोमौ पृथिव्याः श्रयतां वैश्वदेवाग्निमारुते उक्थे
 अव्यथयन्ती स्तभ्रीताः शाक्ररैवते सामनी प्रतिष्ठित्या
 अन्तरिक्षायर्षयस्त्वा प्रथमजा देवेषु दिवो मात्रया वरिणा
 प्रथन्तु विधृता चायमधिपतिश्च ते त्वा सर्वे संविदाना
 नाकस्य पृष्ठे सुवर्गे लोके यजमानं च सादयन्तु॥६॥

प्रतीची दिङ्मरुतस्ते देवा अधिपतयश्चत्वारिंशच्च॥ [२]

अयम्पुरो हरिकेशः सूर्यरश्मिस्तस्य रथगृथ्सश्च रथौजाश्च
 सेनानिग्रामण्यौ पुञ्जिकस्थला च कृतस्थला चाप्सरसौ
 यातुधाना हेती रक्षांसि प्रहेतिरयं दक्षिणा विश्वकर्मा
 तस्य रथस्वनश्च रथेचित्रश्च सेनानिग्रामण्यौ मेनका च
 सहजन्त्या चाप्सरसौ दक्षवः पशवो हेतिः पौरुषेयो
 वधः प्रहेतिरयम्पश्चाद्विश्वव्यचास्तस्य रथप्रोतश्चासंमरथश्च
 सेनानिग्रामण्यौ प्रम्लोचन्ती च॥७॥

अनुम्लोचन्ती चाप्सरसौ सर्पा हेतिर्व्याघ्राः प्रहेतिरयमुत्तराथ्स
 सेनजिच्च सुषेणश्च सेनानिग्रामण्यौ विश्वाची च घृताची
 चाप्सरसावापो हेतिर्वातः प्रहेतिरयमुपर्यर्वाग्वसुस्तस्य

ताक्ष्यश्चारिष्टनेमिश्च सेनानिग्रामण्यावुर्वशी च पूर्वचित्तिश्चाप्सरस
विद्युद्धेतिरवस्फूर्जन्प्रहेतिस्तेभ्यो नमस्ते नो मृडयन्तु ते
यम्॥८॥

द्विष्मो यश्च नो द्वेष्टि तं वो जम्भे दधाम्यायोस्त्वा
सदने सादयाम्यवतश्छायायां नमः समुद्राय नमः समुद्रस्य
चक्षसे परमेष्ठी त्वा सादयतु दिवः पृष्ठे व्यचस्वतीम्प्रथस्वतीं
विभूमतीम्प्रभूमतीं परिभूमतीं दिवं यच्छु दिवं दृ९ह
दिवं मा हि९सीर्विश्वस्मै प्राणायानाय व्यानायोदानाय
प्रतिष्ठायै चरित्राय सूर्यस्त्वाभि पातु मह्या स्वस्त्या छुर्दिषा
शन्तमेन तया देवतयाङ्गिरस्वद्धुवा सीद। प्रोथदश्वो न यवसे
अविष्यन् यदा महः संवरणाद्व्यस्थात्। आदस्य वातो अनु
वाति शोचिरध स्म ते व्रजनं कृष्णमस्ति॥९॥

प्रमोचन्ती च य९ स्वस्त्याष्टवि९शतिश्च॥ [३]

अग्निर्मूर्धा दिवः ककुत्पतिः पृथिव्या अयम्। अ५पा९
रेता९सि जिन्वति॥ त्वामग्ने पुष्करादध्यथर्वा निरमन्थत।
मूर्ध्नो विश्वस्य वाघतः॥ अयमग्निः संहस्त्रिणो वाजस्य
शतिनस्पतिः। मूर्धा कवी रयीणाम्॥ भुवो यज्ञस्य रजसश्च

ने॒ता य॒त्रां नि॒यु॒द्धिः सच॑से शि॒वाभिः॑। दि॒वि मूर्धा॑नं दधिषे
सुव॒र्षां जि॒ह्वा॒म॒ग्रे च॒कृषे॑ हव्य॒वाह॑म्॥ अबो॑ध्य॒ग्निः स॒मिधा॑
जना॑नाम्॥१०॥

प्रति॑ धे॒नुमि॑वा॒य॒तीमु॒षास॑म्। य॒ह्वा इ॒व प्र व॒यामु॑ज्जिहा॑नाः
प्र भा॒नवः॑ सि॒स्रते॒ नाक॑मच्छ॑। अ॒वो॒चाम॑ क॒वये॑ मे॒ध्याय॑ व॒चो
व॒न्दारु॑ वृष॒भाय॑ वृ॒ष्णो। ग॒र्वि॒ष्टिरो॒ नम॑सा॒ स्तोम॑म॒ग्नौ दि॒वीव॑
रु॒क्ममु॑र्व्यश्च॒मश्रे॑त्। जन॑स्य गो॒पा अ॑जनिष्ट॒ जागृ॑विर॒ग्निः
सु॒दक्षः॑ सु॒वि॒ताय॑ नव्य॑से। घृ॒तप्र॑तीको बृ॒हता॑ दि॒विस्पृ॑शा
द्यु॒मद्वि॑ भा॒ति भ॒र॒तेभ्यः॑ शुचिः॑। त्वा॒म॒ग्रे अ॒ङ्गिर॑सः॥११॥

गुहा॑ हि॒तम॑न्व॒विन्द॑ञ्छि॒श्रिया॑णं वने॑वने। स जा॑यसे
म॒थ्यमा॑नः स॒हो म॒हत्त्वा॑मा॒हुः स॒ह॑स॒स्पुत्र॑म॒ङ्गिरः॑। य॒ज्ञस्य॑
के॒तुम्प्र॑थ॒मम्पु॒रोहि॑तम॒ग्निं नर॑स्त्रिषध॒स्थे स॑मि॒न्धते॑। इ॒न्द्रेण॑
दे॒वैः स॒रथ॑ꣳ स ब॒र्हिषि॑ सीद॒न्नि हो॑ता॒ य॒ज॒थाय॑ सु॒क्रतुः॑। त्वं
चि॒त्रश्र॑वस्तम॒ हव॑न्ते वि॒क्षु ज॒न्तवः॑। शो॒चिष्वे॑शं पु॒रुप्रि॑या॒ग्रे
ह॒व्याय॑ वोढ॑वे। स॒खायः॑ सं वः॑ स॒म्यश्च॑मिष॑म्॥१२॥

स्तोमं॑ चा॒ग्नयै॑। व॒र्षि॑ष्ठाय क्षि॒तीना॑मूर्जो॒ नग्रे॑ स॒ह॑स्वते।
सꣳस॒मिद्यु॑वसे वृष॒न्नग्रे॑ वि॒श्वान्य॑र्य आ। इ॒डस्प॑दे स॒मि॒ध्यसे॑

स नो वसू॒न्या भ॑र। ए॒ना वो अ॒ग्निं नम॑सो॒र्जो नपा॑त॒मा
हु॑वे। प्रि॒यं चेति॑ष्ठम॒रति॑ः स्व॒ध्वरं॑ वि॒श्वस्य॑ दू॒तम॒मृत॑म्। स
यो॑जते अरु॒षो वि॒श्वभो॑जसा॒ स दु॑द्रव॒त्स्वाहु॑तः। सु॒ब्रह्मा॑ य॒ज्ञः
सु॒शर्मा॑॥१३॥

वसू॑नां दे॒वः रा॒धो जना॑नाम्। उ॒दस्य॑ शो॒चिर॑स्थादा॒जुह्वा॑नस्य
मी॒दुषः॑। उ॒द्धूमा॑सो अरु॒षासो॑ दि॒विस्पृ॑शः॒ सम॒ग्निमि॑न्धते
नरः॑। अ॒ग्ने वा॒जस्य॑ गोम॑त॒ ईशा॑नः॒ सह॑सो य॒हो। अ॒स्मे
धे॑हि जा॒तवे॒दो म॒हि श्रवः॑। स इ॒धानो॑ वसु॑ष्क॒विर॒ग्निरी॑डे॒न्यो
गि॒रा। रे॒वद॒स्मभ्य॑ पु॒र्वणी॑क दी॒दिहि॑। क्ष॒पो रा॑ज॒न्नुत॑ त्मना॒ग्ने
वस्तो॑रु॒तोष॑सः। स ति॑ग्मज॒म्भ॥१४॥

र॒क्षसो॑ द॒ह प्र॑ति। आ ते॑ अ॒ग्न इ॒धीम॑हि द्यु॒मन्तं॑ दे॒वाज॑रम्।
यद्ध॒ स्या ते॒ पनी॑यसी॒ समि॑द्दी॒दय॑ति॒ द्यवी॑षः॒ स्तो॒तृभ्य॑
आ भ॑र। आ ते॑ अ॒ग्न ऋ॒चा ह॒विः शु॒क्रस्य॑ ज्यो॒तिष॑स्पते।
सु॒श्व॒न्द्र द॒स्म वि॑ष॒ते ह॒व्यवा॑द्भु॒भ्यः॑ हू॒यत॑ इ॒षः॒ स्तो॒तृभ्य॑
आ भ॑र। उ॒भे सु॑श्व॒न्द्र सर्पि॑षो॒ दर्वी॑ श्री॒णीष॑ आ॒सनि॑। उ॒तो
न॒ उत्पु॑र्याः॥१५॥

उ॒क्थे॑षु॒ शव॑सस्प॒त इ॒षः॒ स्तो॒तृभ्य॑ आ भ॑र। अ॒ग्ने तम॑द्याश्वं

न स्तोमैः क्रतुं न भद्रं हृदिस्पृशम्। ऋध्यामां त ओहैः।
 अधा ह्यग्रे क्रतोर्भद्रस्य दक्षस्य साधोः। रथीरऋतस्य बृहतो
 बभूथ। आभिष्टे अद्य गीर्भिर्गुणन्तोऽग्रे दाशेम। प्र ते दिवो
 न स्तनयन्ति शुष्माः। एभिर्नो अर्केर्भवा नो अर्वाङ्॥१६॥

सुवर्न ज्योतिः। अग्रे विश्वेभिः सुमना अनीकैः। अग्निः
 होतारम्मन्ये दास्वन्तं वसोः सूनुः सहसो जातवेदसम्। विप्रं
 न जातवेदसम्। य ऊर्ध्वयां स्वध्वरो देवो देवाच्या कृपा।
 घृतस्य विभ्राष्टिमनु शुक्रशोचिष आजुह्वानस्य सर्पिषः। अग्रे
 त्वन्नो अन्तमः। उत त्राता शिवो भव वरूथ्यः। तं त्वा शोचिष्ठ
 दीदिवः। सुम्राय नूनमीमहे सखिभ्यः। वसुरग्निर्वसुश्रवाः।
 अच्छा नक्षि द्युमत्तमो रयिं दाः॥१७॥

जनानामङ्गिरस इषं सुशमी तिग्मजम्भ पुपूया अर्वाङ्गसुश्रवाः पञ्च च॥—[४]

इन्द्राग्निभ्यां त्वा सयुजा युजा युनज्म्याघाराभ्यां
 तेजसा वर्चसोक्थेभिः स्तोमैर्भिश्छन्दोभी रय्यै पोषाय
 सजातानाम्मध्यमस्थेयाय मया त्वा सयुजा युजा
 युनज्म्यम्बा दुला निततिरभ्रयन्ती मेघयन्ती वर्षयन्ती
 चुपुणीका नामासि प्रजापतिना त्वा विश्वाभिर्धीभिरुप दधामि

पृथिव्युदपुरमन्त्रेन विष्टा मनुष्यास्ते गोप्तारोऽग्निर्वियन्तोऽस्यां
तामहम्प्र पद्ये सा ॥१८॥

मे शर्म च वर्म चास्त्वधिद्यौरन्तरिक्षं ब्रह्मणा विष्टा मरुतस्ते
गोप्तारो वायुर्वियन्तोऽस्यां तामहम्प्र पद्ये सा मे शर्म च
वर्म चास्तु द्यौरपराजितामृतेन विष्टादित्यास्ते गोप्तारः सूर्यो
वियन्तोऽस्यां तामहम्प्र पद्ये सा मे शर्म च वर्म चास्तु ॥१९॥

साऽष्टाचत्वारिंशच्च ॥ [५]

बृहस्पतिस्त्वा सादयतु पृथिव्याः पृष्ठे ज्योतिष्मतीं
विश्वस्मै प्राणायापानाय विश्वं ज्योतिर्यच्छाग्निस्तेऽधिपतिर-
विश्वकर्मा त्वा सादयत्वन्तरिक्षस्य पृष्ठे ज्योतिष्मतीं
विश्वस्मै प्राणायापानाय विश्वं ज्योतिर्यच्छ वायुस्तेऽधिपतिः
प्रजापतिस्त्वा सादयतु दिवः पृष्ठे ज्योतिष्मतीं विश्वस्मै
प्राणायापानाय विश्वं ज्योतिर्यच्छ परमेष्ठी तेऽधिपतिः
पुरोवातसनिरस्यभ्रसनिरसि विद्युत्सनिः ॥ २० ॥

असि स्तनयिबुसनिरसि वृष्टिसनिरस्यग्रेर्यान्यसि
देवानामग्रेर्यान्यसि वायोर्यान्यसि देवानां वायोयान्यस्यन्तरिक्षस्य
यान्यसि देवानामन्तरिक्षयान्यस्यन्तरिक्षमस्यन्तरिक्षाय त्वा

सलिलाय॑ त्वा॒ सर्णी॑काय॒ त्वा॒ सती॑काय॒ त्वा॒ केता॑य
 त्वा॒ प्रचे॑तसे॒ त्वा॒ विव॑स्वते॒ त्वा॒ दि॒वस्त्वा॒ ज्योति॑ष
 आदि॒त्येभ्य॑स्त्व॒र्चे त्वा॑ रु॒चे त्वा॑ द्यु॒ते त्वा॑ भा॒से त्वा॒ ज्योति॑षे
 त्वा॒ यशो॑दां॒ त्वा॒ यश॑सि॒ तेजो॑दां॒ त्वा॒ तेज॑सि॒ पयो॑दां॒ त्वा॒
 पय॑सि॒ वर्चो॑दां॒ त्वा॒ वर्च॑सि॒ द्रवि॑णो॒दां त्वा॒ द्रवि॑णे सादयामि॒
 तेन॑र्षि॒णा तेन॑ ब्रह्म॒णा तया॑ दे॒वत॑याङ्गि॒रस्व॑द्धु॒वा सी॑द॥ २१ ॥

विद्यु॒त्सनि॑द्यु॒त्वैका॒त्रि॒९शच्च॑॥ [६]

भूय॑स्कृ॒दसि॑ वरि॒वस्कृ॑दसि॒ प्राच्य॑स्य॒ध्वास्य॑न्तरि॒क्षस॑दस्य॒न्त
 सी॒दाप्सु॑षदसि॒ श्येन॑सदसि॒ गृध्र॑सदसि॒ सुपर्ण॑सदसि॒
 नाक॑सदसि॒ पृथि॑व्यास्त्वा॒ द्रवि॑णे सादयाम्य॒न्तरि॑क्षस्य॒ त्वा॒
 द्रवि॑णे सादयामि॒ दि॒वस्त्वा॒ द्रवि॑णे सादयामि॒ दि॒शां त्वा॒
 द्रवि॑णे सादयामि॒ द्रवि॑णो॒दां त्वा॒ द्रवि॑णे सादयामि॒ प्रा॒णं मे॑
 पा॒ह्यपा॑नं मे॑ पा॒हि व्या॑नम्मे॥ २२ ॥

पा॒ह्यायु॑र्मे पा॒हि वि॒श्वायु॑र्मे पा॒हि स॒र्वायु॑र्मे पा॒ह्यग्ने॒ यत्ते॒
 पर॑९ ह॒न्नाम॒ तावे॑हि॒ स९ र॑भावहै॒ पाञ्च॑ज॒न्येष्व॑प्य॒ध्यग्ने॒ यावा॑
 अया॑वा॒ एवा॒ ऊमाः॒ स॒ब्दः॒ स॒गरः॒ सु॒मेकः॑॥ २३ ॥

व्या॒नम्मे॒ द्वात्रि॑९शच्च॑॥ [७]

अग्निना विश्वाषाट्सूर्येण स्वराङ्गत्वा शचीपतिरऋषभेण
 त्वष्टा यज्ञेन मघवान्दक्षिणया सुवर्गो मन्युना वृत्रहा सौहार्द्वेन
 तनूधा अन्नेन गयः पृथिव्यासनोदृग्भिरन्नादो वषट्कारेणर्द्धः
 साम्ना तनूपा विराजा ज्योतिष्मान् ब्रह्मणा सोमपा गोभिर्यज्ञं
 दाधार क्षत्रेण मनुष्यान्श्वेन च रथेन च वज्र्यतुभिः प्रभुः
 संवत्सरेण परिभूस्तपसानाधृष्टः सूर्यः सन्तनूभिः ॥ २४ ॥

अग्निनैकान्नपञ्चाशत् ॥ [८]

प्रजापतिर्मनसान्धोऽच्छेतो धाता दीक्षायाः सविता भृत्यां
 पूषा सोमक्रयण्यां वरुण उपनद्धोऽसुरः क्रीयमाणो मित्रः
 क्रीतः शिपिविष्ट आसादितो नरन्धिषः प्रोह्यमाणो-
 ऽधिपतिरागतः प्रजापतिः प्रणीयमानोऽग्निराग्नीध्रे
 बृहस्पतिराग्नीध्रात्प्रणीयमान इन्द्रो हविर्धानेऽदितिरासादितो
 विष्णुरुपावहियमाणोऽथर्वोपोत्तो यमोऽभिषुतोऽपूतपा
 आधूयमानो वायुः पूयमानो मित्रः क्षीरश्रीर्मन्थी
 संक्तुश्रीर्वैश्वदेव उन्नीतो रुद्र आहुतो वायुरावृत्तो नृचक्षाः
 प्रतिख्यातो भक्ष आगतः पितृणां नाराशः सोऽसुरात्तः
 सिन्धुरवभृथमवप्रयन्त्समुद्रोऽवगतः सलिलः प्रप्लुतः

सुव॑रु॒द्वचं॑ ग॒तः॥ २५॥

रु॒द्र एक॑विंशतिश्च॥ _____ [९]

कृ॒त्तिका॑ नक्ष॑त्रम॒ग्निर्दे॒वता॒ग्ने रुचः॑ स्थ प्र॒जाप॑तेर्धा॒तुः
सोम॑स्य॒र्चे त्वा॑ रु॒चे त्वा॑ द्यु॒ते त्वा॑ भा॒से त्वा॒ ज्योति॑षे त्वा
रोहि॑णी नक्ष॑त्रं प्र॒जाप॑तिर्दे॒वता॑ मृ॒गशी॑र्षं नक्ष॑त्रं सोमो॑
दे॒वता॑र्द्रा नक्ष॑त्रं रु॒द्रो दे॒वता॑ पुन॑र्वसू नक्ष॑त्रमदि॒तिर्दे॒वता॑
ति॒ष्यो नक्ष॑त्रम्बृह॒स्पति॑र्दे॒वता॑श्रेषा नक्ष॑त्रं सर्पा॑ दे॒वता॑ म॒घा
नक्ष॑त्रम्पि॒तरो॑ दे॒वता॑ फल्गु॑नी नक्ष॑त्रम्॥ २६॥

अ॒र्यमा॑ दे॒वता॑ फल्गु॑नी नक्ष॑त्रम्भगो॑ दे॒वता॑ ह॒स्तो
नक्ष॑त्रं सवि॑ता दे॒वता॑ चि॒त्रा नक्ष॑त्रमिन्द्रो॑ दे॒वता॑ स्वा॒ती
नक्ष॑त्रं वा॒युर्दे॒वता॑ वि॒शाखे॑ नक्ष॑त्रमिन्द्रा॒ग्नी दे॒वता॑ऽनू॒रा॒धा
नक्ष॑त्रमि॒न्द्रो दे॒वता॑ रोहि॑णी नक्ष॑त्रमिन्द्रो॑ दे॒वता॑ वि॒चृ॒तौ
नक्ष॑त्रम्पि॒तरो॑ दे॒वता॑षा॒ढा नक्ष॑त्रमा॒पो दे॒वता॑षा॒ढा नक्ष॑त्रं
वि॒श्वे दे॒वा दे॒वता॑ श्रो॒णा नक्ष॑त्रं विष्णु॑र्दे॒वता॑ श्रवि॑ष्ठा नक्ष॑त्रं
वस॑वः॥ २७॥

दे॒वता॑ श॒तभि॑षङ्गक्ष॑त्रमिन्द्रो॑ दे॒वता॑ प्रोष्ठ॑प॒दा नक्ष॑त्रम॒ज
एक॑पाद्दे॒वता॑ प्रोष्ठ॑प॒दा नक्ष॑त्रमहि॒र्बुध्नियो॑ दे॒वता॑ रे॒वती॑ नक्ष॑त्रं

पूषा देवतांश्चयुजौ नक्षत्रमश्विनौ देवतापभरणीर्नक्षत्रं यमो
देवता पूर्णा पश्चाद्यत्ते देवा अदधुः॥२८॥

फल्युनी नक्षत्रं वसंवस्त्रयस्त्रिंशच्च॥ [१०]

मधुश्च माधवश्च वासन्तिकावृतू शुक्रश्च शुचिश्च ग्रेष्मावृतू
नभश्च नभस्यश्च वार्षिकावृतू इषश्चोर्जश्च शारदावृतू
सहश्च सहस्यश्च हैमन्तिकावृतू तपश्च तपस्यश्च शैशिरावृतू
अग्नेरन्तःश्लेषोऽसि कल्पेतां द्यावापृथिवी कल्पन्तामाप
ओषधीः कल्पन्तामग्नयः पृथङ्म ज्यैष्ठ्याय सव्रताः॥२९॥

यैऽग्नयः समनसोऽन्तरा द्यावापृथिवी शैशिरावृतू अभि
कल्पमाना इन्द्रमिव देवा अभि सं विशन्तु संयच्च प्रचेताश्चाग्नेः
सोमस्य सूर्यस्योग्रा च भीमा च पितृणां यमस्येन्द्रस्य ध्रुवा
च पृथिवी च देवस्य सवितुर्मरुतां वरुणस्य धर्त्री च धरित्री
च मित्रावरुणयोर्मित्रस्य धातुः प्राची च प्रतीची च वसूनां
रुद्राणाम्॥३०॥

आदित्यानान्ते तेऽधिपतयस्तेभ्यो नमस्ते नो मृडयन्तु ते
यं द्विष्मो यश्च नो द्वेष्टि तं वो जम्भे दधामि सहस्रस्य
प्रमा असि सहस्रस्य प्रतिमा असि सहस्रस्य विमा असि

सहस्रस्योन्मा असि साहस्रोऽसि सहस्राय त्वेमा मे अग्र
इष्टका धेनवः सन्त्वेका च शतं च सहस्रं चायुतं च॥३१॥

नियुतं च प्रयुतं चार्बुदं च न्यर्बुदं च समुद्रश्च मध्यं
चान्तंश्च परार्धश्चेमा मे अग्र इष्टका धेनवः सन्तु षष्टिः
सहस्रमयुतमक्षीयमाणा ऋतस्थाः स्थर्तावृधो घृतश्रुतो
मधुश्रुत ऊर्जस्वतीः स्वधाविनीस्ता मे अग्र इष्टका धेनवः
सन्तु विराजो नाम कामदुघा अमुत्रामुष्मिल्लौके॥३२॥

सप्रता रुद्राणामयुतं च पञ्चचत्वारिंशच्च॥ [११]

समिद्धिशामाशया नः सुवर्विन्मधोरतो माधवः पात्वस्मान्।
अग्निर्देवो दुष्टरीतुरदाभ्य इदं क्षत्रं रक्षतु पात्वस्मान्।
रथंतरं सामभिः पात्वस्मान्गायत्री छन्दसां विश्वरूपा।
त्रिवृन्नो विष्टया स्तोमो अह्नां समुद्रो वात इदमोजः पिपर्तु।
उग्रा दिशामभिभूतिर्वयोधाः शुचिः शुक्रे अहन्योजसीना।
इन्द्राधिपतिः पिपृतादतो नो महि॥३३॥

क्षत्रं विश्वतो धारयेदम्। बृहत्सामं क्षत्रभृद्वृद्धवृष्णियं
त्रिष्टुभौजः शुभितमुग्रवीरम्। इन्द्र स्तोमेन पञ्चदशेन
मध्यमिदं वातेन सगरेण रक्ष। प्राचीं दिशां सहयंशा

यशस्वती॒ विश्वे॑ देवाः प्रावृषा॒हा॒ सुव॑र्वती। इ॒दं क्ष॒त्रं
दुष्ट॑र॒म॒स्त्वो॒जोऽना॑धृष्टः॒ सह॑स्त्रियः॒ सह॑स्वत्। वैरू॒पे
साम॑न्नि॒ह तच्छ॑के॒म जग॑त्यैनं वि॒क्ष्वा वैश॑यामः। विश्वे॑ देवाः
सप्त॑द॒शेन॑ ॥ ३४ ॥

वर्च॑ इ॒दं क्ष॒त्रं स॑लिल॒वा॒तमु॒ग्रम्। ध॒र्त्री दि॒शां
क्ष॒त्रमि॒दं दा॑धारो॒प॒स्थाशा॑ना॒मि॒त्रव॑द॒स्त्वो॒जः। मि॒त्रा॒वरु॑णा
श॒रदा॑हा॒ चि॒कि॒लू अ॒स्मै रा॒ष्ट्राय॒ महि॑ शर्म॒ यच्छ॑तम्।
वैरा॒जे साम॑न्नधि॒ मे मनी॑षानुष्टुभा॒ सम्भृ॑तं वी॒र्यं॑ सहः।
इ॒दं क्ष॒त्रमि॒त्रव॑दा॒र्द्रदा॑नु॒ मि॒त्रा॒वरु॑णा॒ रक्ष॑त॒माधि॑पत्यैः।
स॒म्राड्दि॒शा सह॑स्रा॒म्नी सह॑स्वत्यु॒तुर॑हे॒मन्तो॑ वि॒ष्टया॑ नः
पि॒प॒र्तु। अ॒व॒स्यु॒वा॒ताः ॥ ३५ ॥

बृ॒ह॒तीर्नु श॑क्करीरि॒मं य॒ज्ञम॑वन्तु नो घृ॒ताचीः॑। सुव॑र्वती
सु॒दु॒घा नः॑ पय॑स्वती दि॒शां दे॒व्य॑वतु नो घृ॒ताचीः॑। त्वं
गो॒पाः पु॒र॒ए॒तो॒त प॒श्चाद्बृ॑ह॒स्पते॑ या॒म्या यु॒द्धि वा॒चम्। ऊ॒र्ध्वा
दि॒शा सह॑स्रा॒म्नी सं॒व॒त्स॒रेण॑ सवि॒ता नो॑ अ॒ह्नाम्।
रे॒व॒त्स॒माति॑च्छ॒न्दा उ॒ छ॒न्दो॒जा॒तश॑त्रुः स्यो॒ना नो॑ अस्तु।
स्तो॒म॒त्रय॑स्त्रि॒शे भु॑व॒नस्य॑ प॒त्नि वि॒व॒स्व॒द्वा॒ते अ॒भि नः॑ ॥ ३६ ॥

गृणाहि। घृतवती सवितुराधिपत्यैः पर्यस्वती रन्तिराशा
 नो अस्तु। ध्रुवा दिशां विष्णुपत्न्यघोरास्येशाना सहसो या
 मनोता। बृहस्पतिर्मातरिश्वोत वायुः संधुवाना वाता अभि
 नो गृणन्तु। विष्टम्भो दिवो धरुणः पृथिव्या अस्येशाना
 जगतो विष्णुपत्नी। विश्वव्यचा इषयन्ती सुभूतिः शिवा नो
 अस्त्वदितिरुपस्थे। वैश्वानरो न ऊत्या पृष्ठो दिव्यनु नो-
 ऽद्यानुमतिरन्विदनुमते त्वङ्क्या नश्चित्र आ भुवत्को अद्य
 युङ्गे॥ ३७॥

महि सप्तदशेनावस्युवाता अभि नोऽनु नृश्वतुर्दश च॥—————[१२]

नमस्ते रुद्र नमो हिरण्यबाहवे नमः सहमानाय नम आव्याधिर्नीभ्यो नमो भवाय नमो
 ज्येष्ठाय नमो दुन्दुभ्याय नमः सोमाय नम इरिण्याय द्रापे सहस्राण्येकादश॥[१३] नमस्ते
 रुद्र नमो भवाय द्रापे सप्तविंशतिः॥२७॥ नमस्ते रुद्र तं वो जम्भे दधामि॥